

Slučaj Jusufrić: Praonica za bolji biznis

Kada je [Ibrahim Jusufrić](#) nakon 17 godina rukovođenja firmom podnio neopozivu ostavku na mjesto direktora Kantonalnog javnog komunalnog preduzeća (KJKP) GRAS 2006. godine, iza sebe je ostavio 25,2 miliona KM duga.

Nedugo nakon odlaska iz GRAS-a protiv njega je pokrenuta istraga zbog sumnje da je firmu oštetiio za skoro milion KM.

U privatnom životu je vukao uspješnije poteze: sa suprugom Smiljkom i sinom Jasminom stekao je imovinu vrijednu najmanje 7,5 miliona KM.

Za deset godina porodica je kupila: tri poslovna prostora, dva zemljišta i devastiranu vikendicu u Sarajevu te zemljište u Travniku na kojem su izgradili univerzitet.

Prije toga su imali kuću i poslovni prostor u Sarajevu.

Očevim stopama

Jusufrić je bio direktor javnog gradskog prijevoznika GRAS-a od 1989. do 2006. godine.

Naredne dvije godine je bio na čelu firme "Unioninvest – izgradnja objekata". Sin Jasmin se nije odvajao od oca pa se kao svježi diplomac sarajevskog Elektrotehničkog fakulteta 2002. godine zaposlio na mjesto rukovodioca Informatičke službe u GRAS-u. Tu je ostao do januara 2007., a u martu postaje rukovodilac Tehničke službe firme "Unioninvest – izgradnja objekata". Obojica su napustila preduzeće 2008. godine.

Do tada je Jasmin Jusufrić već bio vlasnik dva poslovna prostora u sarajevskom naselju Čengić Vila i zemljišta u naselju Osijek.

Prvi prostor od 43 kvadratna metra mu je kupio otac u junu 2004. godine za 60.000 KM. Naredne godine je sa majkom Smiljkom kupio poslovni prostor od 208 kvadrata, plativši ga 416 hiljada KM. Nekretnina je bila skuplja, ali su Jusufranići dobili popust od 10 posto jer su je platili odjednom.



Jusufranići žive u skupocjenoj vili u Sarajevu. (Foto: CIN)

Jasmin je novinarima Centra za istraživačko novinarstvo (CIN) rekao da ne zna o kakvoj se nekretnini radi: "Ja nisam kupio ništa, ne znam o kojem prostoru vi govorite. (...) Prvi put to čujem, iskreno da vam kažem".

Jusufranić mlađi je u martu 2006. godine kupio i parcelu uz magistralnu cestu na zapadnom izlazu iz Sarajeva u naselju Osijek. Za nešto više od tri ducata platio je 90.000 KM.

Nakon otvaranja istrage Federalne uprave policije (FUP) protiv njega u augustu 2007. godine zbog nezakonite trgovine dionicama Jasmin je svoj udio u poslovnim prostorima prenio na oca i majku.

Tužilaštvo Kantona Sarajevo (KS) ga sumnjiči za utaju poreza i pranje novca, tvrdeći da su mu dioničari firme “Unioninvest – izgradnja objekata” fiktivnim ugovorima o poklonu darovali 8.091 dionicu koje je, ustvari, on platio oko 353.000 KM.

Te godine je njegova majka Smiljka kupila nešto više od četiri duluma zemlje i devastiranu vikendicu u Miševićima kod Sarajeva za 77 hiljada KM.



Smiljka Jusufrić je devastiranu vikendicu i plac u Miševićima kod Sarajeva platila 77.000 KM. (Foto: CIN)

To je bila njena peta uknjižena nekretnina u Sarajevu od početka devedesetih. Osim poslovnog prostora koji je kupila sa sinom, Smiljka Jusufrić je od prije rata vlasnica još jednog poslovnog prostora. Kuću sa zemljištem od jednog duluma je kupila 1999. godine za 81.500 KM. Tu se sada nalazi novoizgrađena skupocjena vila sa bazenom u kojoj žive supružnici Jusufrić.

Smiljka Jusufrić kaže da Ibrahim i ona dolaze iz bogatih

porodica te da su i prije rata bili imućni: “Ja i on jako dobro znamo u šta se ulažu pare i kako se parama barata. Mi nismo raspikuće”.

Posljednju nekretninu, poslovni prostor od 19 kvadratnih metara u sarajevskom naselju Čengiće Vila, kupio je Ibrahim Jusufrić u februaru 2014. godine za 20 hiljada KM.

Jusufrić je odbio razgovarati sa novinarima CIN-a o tome kako je za deset godina uspio finansirati kupovinu svih nekretnina i izgradnju zgrade privatnog univerziteta.



Jasmin Jusufrić i njegova majka Smiljka su platili 416.000 KM za poslovni prostor u prizemlju zgrade u sarajevskom naselju Čengiće Vila. (Foto: CIN)

Nakon GRAS-a univerzitet

Ibrahim Jusufrić je sredinom novembra 2006. godine u Travniku osnovao Fakultet za privrednu i tehničku logistiku (FPTL). Dva mjeseca kasnije sin Jasmin postaje vlasnik Saobraćajnog fakulteta. Istog mjeseca šurjak Branislav

Petrović registruje i Ekonomski fakultet.

Petrović je bio šef Turističke poslovnice u GRAS-u za vrijeme Jusufrićevog mandata. Njih dvojicu Tužilaštvo KS-a optužuje za manipulisanje tenderima, kojim su oštetili firmu.

Jusufranić je 2010. godine osnovao Internacionalni univerzitet "Travnik" koji danas broji sedam fakulteta. Po osnivanju Univerziteta Jusufriću je bio potreban prostor za njegov rad pa je nakon pet mjeseci u blizini nogometnog stadiona "Pirota" u Travniku kupio zemljište za 887 hiljada KM. Sada se tu na površini od skoro sedam duluma nalaze velika zgrada, parking i uređeno zemljište. Prema finansijskim podacima, u izgradnju i opremu je do kraja 2014. godine uloženo nešto manje od šest miliona KM.



Jusufranić je do 2015. godine uložio skoro šest miliona KM u izgradnju zgrade Univerziteta u Travniku. (Foto: CIN)

Ibrahim Jusufrić se odgovornije odnosio prema privatnom nego prema državnom preduzeću. Prema Informaciji o poslovanju GRAS-a, preduzeće je od 2002. do 2005. godine nagomilalo 25,2 miliona KM duga. Kantonalno tužilaštvo je optužilo Jusufrića da je odlukom o kupovini četiri praonice za GRAS-ova vozila od slovenske firme "Elesprom" 2004. godine ošteti preduzeće za skoro 883 hiljade KM. Suđenje je počelo u novembru prošle godine.



Jusufranići su u svom prostoru u sarajevskom naselju Čengić Vila otvorili poslovnicu Internacionalnog univerziteta "Travnik". (Foto: CIN)

U optužnici piše da je Jusufranić insistirao na nepotrebnoj nabavci, iako je znao da GRAS nema novca za to. Šteta je nastala zbog kamata na kredit koji je preduzeće moralo podići da bi kupilo praonice, a kasnije i zbog plaćanja ležarine za praonice koje nisu radile jer GRAS nije imao dozvole za njihovu ugradnju i rad.

Prema optužnici, Jusufranić je početkom 2004. godine predložio Upravnom odboru preduzeća nabavku praonica, pritom prešutivši Izvještaj Radne grupe GRAS-a u kojem piše da za tim nema potrebe. On je u izjavi Tužilaštvu KS-a rekao da je to bio interni izvještaj koji nije bio dužan dostaviti Odboru.

Nabavkom praonica, prema mišljenju Jusufrića, GRAS bi uštedio novac za plaće za više od 60 čistačica koje su ručno prale vozila.

Upravni odbor je krajem iste godine, ne znajući za Izvještaj, prihvatio ponudu slovenskog "Elesproma".

Devet i po godina nakon isporuke praonice koje je GRAS platio 1,82 miliona KM i dalje ne rade. "I dan-danas praonice, praktično, stoje neugrađene. Odnosno, jedna je ugrađena, ali ona nije u potpunosti u funkciji", kaže za CIN kantonalni tužilac Senad Osmić.



Jasmin Jusufrić je za plac od 3,2 duluma na izlazu iz Sarajeva platio 90.000 KM. (Foto: CIN)

Krivotvorenjem do pobjede na tenderu

Osim ovoga Tužilaštvo KS-a optužuje Ibrahima Jusufrića da je sa Petrovićem pomogao sarajevskoj podružnici njemačke firme "Hellner & More" da pobijedi na tenderu za prodaju reklamnog prostora u vozilima GRAS-a. Tako su oštetili firmu za 95.700

KM. Petrović je bio neformalni direktor ove podružnice i našao se u dvostrukoj ulozi pri zaključivanju ugovora. Naime, Tužilaštvo KS-a tvrdi da je Petrović kao predsjednik Komisije za izbor najbolje ponude krivotvorio tendersku dokumentaciju i nakon sklopljenog ugovora potpisivao dokumente za GRAS u kojima je manipulirao cijenom reklamnog prostora.

“Tačno je da Brane (Petrović) nije imao nikakvo pismeno ovlaštenje, ali ja sam smatrao da on odgovorno radi svoj posao”, rekao je Jusufrić na saslušanju.

Polovinom decembra prošle godine održano je ročište na kojem su se Jusufrić i Petrović izjasnili da nisu krivi.

Oni tada nisu htjeli razgovarati sa novinarima CIN-a. Jusufrićevi advokati Senad Kreho i Muhidin Kapo su na pitanje novinara o njegovoj imovini kazali da je on bogat čovjek, veliki radnik i da ima svoj univerzitet.

“Čovjek je uspješan”, rekao je advokat Kapo.